

**«Коми му» газетлӧн кольӧм вежонся номерын «Юав – вочавидзам» рубрика улын гижӧдыс вӧлі сідз шусяна брачнӧй договор йылысь.**

**–А позьӧ оз киритны гозъя костын татшӧм сёрнитчӧмсӧ? – окота лоӧма тӧдны Сыктив- карысь миянлысь газет лыддысьлы.**

**Сетам и сылы вочакывсӧ.**

Брачнӧй договорсӧ позьӧ вежны либӧ киритны кырымалӧм бӧрас кӧть кор, гозъя кӧ кыкнанныс талы абу паныдӧсь. Та могысь бара на ковмас шыӧдчывны нотариус дорӧ, мед вынсьӧдас кабаласӧ аслас кырымпасӧн.

Но сэк жӧ оз позь, мед та дырйи кутшӧмакӧ лои кедзвӧтӧма верӧссӧ либӧ гӧтырсӧ. Шуам, гозъялӧн юксигӧн верӧсыслы вичмӧ керка, дача, гараж да машина, а гӧтырыслы – сӧмын ӧти жыръя патера, мед кӧть и тадзи урчитӧма мӧдысь дасьтӧм брачнӧй договорас. Татшӧм кабаласӧ позьӧ киритны, шуны рочӧн кӧ, недействительнӧйӧн.

Татшӧм кабала сертиыс гӧтырлы либӧ верӧслы оз вермы вуджны ӧта-мӧдсянныс сэтшӧм эмбур, кодӧс колӧ регистрируйтны (шуам, патера, керка либӧ машина). Та могысь колӧ кырымавны эмбурсӧ козьналӧм йылысь торъя договор.

Семьялӧн кодекс серти брачнӧй договорсӧ позьӧ киритны (шуны недействительнӧйӧн) судӧ шыӧдчӧмӧн сэк, кор:

–тайӧ документыс оз лӧсяв оланпаслы;

–сійӧс кырымалӧма мода вылас (мнимая сделка) либӧ тайӧ договорнас саймовтӧма татшӧмсяма мӧд документ («притворная сделка»);

–договора с кырымпа ссӧ пунктӧма сідз шусяна недееспособнӧй морт да с.в.

Брачнӧй договорсӧ кырымалӧм бӧрас кӧ гозъяысь кодарыскӧ гӧгӧрвоас, мый пӧлыс сійӧс ылӧдлӧма, то кабаласӧ киритӧм могысь сійӧ вермас шыӧдчыны судӧ.